

ALAHADY 1 - FIAVIAN'NY TOMPO - B



« Mitandrema, miambena, ary mivavaha, fa tsy fantatrareo izay hiavian'ny fotoana » (Mk. 13: 33)

Ry Kristianina havana, tamin'ny Alahady lasa teo no nankalazaintsika tamin'ny fomba manetriketrika an'i Kristy Mpanjakan'izao rehetra izao, Mpanjaka tokoa i Kristy ary tsy araky ny hevitr'izao tontolo izao fa Mpanjaka mikolokolo, manompo, manasoa antsika sy mitondra antsika amin'ny fiainana maha-zanak'Andriamanitra, Izy izay Mpiandry ondry tsara mahafoy ny ainy ho an'ny ondriny ary dia izany no modely ho an'ny mpanjaka rehetra sy mpitondra rehetra na ara-nofo na ara-panahy ho an'izay manana andraikitra rehetra. Nifampiarahaba isika tamin'ny fankalazana an'i Kristy Mpanjaka satria famaranana ny taona litorjika izany hoe taona nibanjinantsika sy nandalinantsika ny finoantsika taorian'ny fankalazana ny taona masina ny famindram-po ka nametrahantsika teto

Vakiteny I : Iz. 63, 16b-17, 19b; 64, 2b-7
Tononkira : Sal. 26,
Vakiteny II : 1 Kôr. 1, 3-9
Evanjely : Mk. 13, 33-37

amin'ny Arsidiousezy avaratra ny lohahevitra hoe “Kristy mpiara-belona isika amin'ireo manodidina antsika”, isika no mampanjaka an'i Kristy amin'ny alalan'ny fiainantsika. Tsy amin'ny alalan'ny herisetra fa génération mpanorina sy mpanatsara ary mpikolokolo isika.

Izany no mampiditra antsika amin'ny taona litorjika vaovao ary amin'ny taona fikatrohana vaovao handalinantsika ny hoe “mamokatra isika, génération mpamokatra harena dia I kristy” satria Kristy mpiara-belona isika ka manolotra an'i Kristy eo amin'ny fiainantsika andavanandro ary mampiditra antsika tokoa hiaina an'izany amin'izao vanim-potoan'ny Fiaviana izao.

Raha mamerina kely isika ny hoe “Avent, na fiaviana” dia tsara ny mamaritra amin'ny fomba tsotra fa misy fiaviana telo. Tadidintsika tsara fa ny fankalazana ho antsika dia sady fahatsiarovana no

mahatonga antsika koa noho ny asan'ny Fanahy Masina mivelona an'izany fankalazana izany. Mankalaza ny fiaviana isika manomboka androany Alahady voalohany fankalazana fiaviana izao ka hamakivakintsika 4 herinandro ny vanim-potoanan'ny fiaviana ka mitondra antsika amin'ny Noely. Matoa isika entanin'ny Eglizy mankalaza an'izany dia ny mba hibanjinantsika ny fiaviana telo :

Ny fiaviana voalohany izay nandrasan'ny vahoakan'Andriamanitra, niandrandra ny vahoaka tamin'izany ka tanteraka tamin'ny fahatarehana sy fahatongavan'i Jesoa ho nofo izany fiaviana izany sy fahasoavana ho an'izay nahay nandray azy, anisan'izany i Masina Maria, i Md Josefa, ireo mpiandry ondry ary ireo vahoaka madinika. Ary nisy koa ireo tahaka an'i Heroda izay tsy nanokatra ny fony ka tsy nandray an'i Jesoa Kristy mpanjaka.

Fampianarana ho antsika ireo ohatra velona ireo indrindra fa ireo izay niandry, niambina ary nanaikty nandray an'i Jesoa, anisan'izany koa i Joany Batista, i Simeona ary Ana ary ny mpaminany nanomana ny vahoaka hahay handray an'i Jesoa, izany ny fiaviana voalohany ankalazaintsika sady hiainantsika noho n y vokatry ny Fanahy Masina. Haka tahaka an'i Masina Maria isika hiandrandra ny fiavian'ny Tompo hahay hanao “Eny” tahaka azy. Haka tahaka an'i Md Josefa ilay lehilahy marina handray an'i Jesoa eo amin'ny fiainantsika ka hahatonga antsika hamokatra eo amin'ny fiainantsika, Tahaka an'i Joany Batista izay mpaminany nijoro ho vavolombelona, mila vavolombelona ny fiainantsika. Haka tahaka ny fahatsoran'ireo mpiandry ondry ka niara-nidera niaraka tamin'ireo anjely. Haka tahaka an'ireo majy manam-pahaizana nefa nahalala sy nanaiky fa i Jesoa no tena fahendrena indrindra. Izany no mitondra amin'ny fiainana marina.

Ny fiaviana faharoa dia izao iainantsika izao amin'ny alalan'ny Sakramenta sady efa nanaovantsika toro-làlana hahatonga antsika ho Kristy Mpiara-belona amin'ny olona satria i Jesoa eo anivontsika ka isika no mitondra azy eo amin'ny mandodina antsika. Raha mifikitra aminy isika araka ny toro-làlana amin'izao taonam-pikatrohana izao ka hitondra antsika amin'ny filan-kevitra pastoral dia hitoetra ao amin'I Kristy isika ary I Kristy hitoetra ao amintsika dia hamokatra ny fiainantsika ka hahasoa sy hahatsara ny hafa fa tsy hoe sanatria hifanipaka toy ny valala ankarina isika ka mifamono. “Génération” mpanorina sy mpampijoro ary mpanatsara sy mpikolokolo fa tsy mpamotika na mpanandrava.

Ny fiaviana fahatelo dia andrasantsika amin'ny fomba manetriketrika i Jesoa miverina amin'ny voninahiny, mampatahotra ny olona izany nefa isika noho ny Fanahy Masina dia mivelona an'izany ary miandry ampaharetena sy feno fanantenana.

Ny tenin'Andriamamnitra arosan'ny Eglizy antsika androany dia efa mampisokatra ny fontsika, ny vakiteny voalohany milaza Izaia mpaminany “*mitongava, sokafy ny lanitra*, izay lazaintsika hoe fiadanana, *midina ianao, mandrovita ny lanitra dia midina tongava eo aminay*”.

Izany no andrandraintsika, enga anie hosokafan'Andriamanitra tokoa ny fo amam-panahintsika, hidina izy handondona amintsika izy ka anjarantsika ny manolotra ny fontsika. Ry Kristianina havana raha sokafantsika ny fontsika ka miditra ny Tompo ary mahazo ny fiadanana miaraka aminy dia izay ny fisokafan'ny lanitra izay nankalazaintsika tamin'ny taonan'ny famindram-po, sokafy ny fontsika ka atolory ny hafa, ampidiro eo amin'ny fontsika i Jesoa nefa aza ahidy na tehirizina ho anao irery fa

ento eo amin'ny manodidina antsika ka hanadio ny fiainantsika isika miaraka amin'i Jesoa. Hahafantarantsika fa miombona amin'Andriamanitra tokoa isika dia izao fotoan'ny fiaviana izao no hanadiovantsika ny fiainantsika izany hoe ialantsika amin'ny fitondran-tena tsy mendrika an'Andriamanitra, ny fiainantsika aoka ho fianana misy an'Andriamanitra ary indrindra ao amin'ny fianakaviana eglizy kely izay loharanon'ny hasoavana rehetra amin'ny fiainantsika ka asiantsika toerana bebe kokoa Andriamanitra dia ny fiarahantsika mivavaka anatin'ny fianakaviana.

Antintraterin'i Md Paoly koa izany ao amin'ny vakiteny faharoa taratasy ho an'ny Korintiana, miantefa amintsika koa ny hafatra napetrany ; aoka isika ho vonona amin'ny fisehoan'i Jesoa, raha manana fiainana miombona amin'i Jesoa isika dia manan-karena *“Isaorako an'Andriamanitra mandrakariva ny aminareo, noho ny fahasoavan'Andriamanitra nomena anareo ao amin'i Jesoa Kristy: fa noho ny firaisanareo aminy, tonga manan-karena amin'ny zavatra rehetra ianareo, dia amin'ny teny rehetra sy amin'ny fahalalana rehetra; ary noho ny niorenan'ny Evanjelin'i Kristy eo aminareo, dia tsy ho latsa-danja noho ny hafa ianareo amin'ny fahasoavana rehetra, hany ka miandry amim-pitokiana ny fisehoan'i Jesoa Kristy Tompontsika”*

Manana an'i Kristy isika ka zary Kristy koa isika ka mamokatra an'i Kristy eo amin'ny fiainantsika, miombona aminy isika izany ny kominio, aza ahidy ao am-pontsika i Kristy fa ento eo amin'ny mpiara-belona mba hamokatra ka miorina amin'izany harena marina izany isika fa tsy harena diso mba tsy ho harena piraty ny iainantsika izany hoe harena mitondra antsika hifampialona, hikorontana sy hitondra antsika amin'ny ady isankarazany. Ny harena tena izy dia mampiombona fa tsy manavakavaka. Koa sokafy ny fontsika ho an'ny hafa, fotoana izao vanim-potoana Fiaviana izao.

Izany ny dikan'ny hoe “ miambena “ ampianarin'i Jesoa ao amin'ny Evanjely. Miambina isika raha misokatra ny fontsika ka mahita an'izay hafatr'Andriamanitra izay eo amin'ny fiainantsika andavanandro tahaka ny nataon'i Masina Maria, ny nataon'i Md Josefa sy ireo mpiandry ondry ary ny majy. Mihidy ny fontsika raha manao tahaka an'i Heroda satria mitodika amin'ny tenantsika ary izay no tsy hahitantsika ny fiadanana eo amin'ny fiainantsika.

Sokafy ny sofintsika handre ny hafatr'Andriamanitra dia ny Teniny izay torina amintsika fa indrindra amin'izao Fiaviana izao. Mitoetra ao amin'i Jesoa isika raha mihaino ny teniny sy manatanteraka ny hafatr'i Jesoa ka manokatra ny sofintsika isika mba handre ny antso sy hiakan'ireo manodidina antsika. Mahalala isika fa mila famonjena izao androntsika izao ka ny tena famonjena dia ny fanolorantsika an'i Jesoa izay tena harena tokoa amin'ireo manodidina antsika.

Sokafy koa ny vavantsika hanambara ny hafalian'ny Vaovao Mahafaly, izany ny atao hoe miambina, mivavaha isika ary mitoria ny hafalian'ny Vaovao Mahafaly amin'ny alalan'ny vavantsika

Izany ny fiaviana homanintsika ry Kristianina havana ka miambena ary mivavaha fa izao no andro sarobidy, mialà amin'ny fitondran-tena tsy mendrika an'Andriamanitra, sokafy ny fontsika hahay handray an'i Jesoa, izy no harena ka mitoera ao aminy isika dia hamokatra be. Raha mamokatra isika dia hiadam-pinaritra ao aminy isika

Ry Jesoa Kristy Tompo ô nampianarinao izahay mba hahay handray anao, hiambina amin'ny fiavianao, aoka anie hanana finoana sy fanantenana ary fitiavana izahay ka hanatanteraka ny fiomanana hahay handray anao, asainao miambina tokoa izahay mba ho vonona hitsena anao amin'ny andro hiavianao amin'ny andro iainanay ka hahazoanay ny tena harena dia ianao ka hamokatra ny fiainanay. Enga anie izahay hanana fahasahiana ka hanilika ireo vato misakana rehetra tsy hahaizanay mandray anao. Enga anie izahay hiala amin'ny harena mandrendrika anay sy ny fiaraha-moninay sy ny fianakavianay, Enga anie izahay mba ho fahazavana ho an'ny hafa ka hitarika azy ireo hiomana koa handray anao, amin'izay handresy ny ratsy izahay ka hamokatra araky ny sitrakao. Amen

Mompera Arseveka Mgr Benjamin Ramaroson